

Karyawan IT dilantik ketuai sayap belia AMP



ENCIK MUHD SHAMIR:
Menggantikan
Encik Saktiandi
Supaat. – Foto fail.

ANGKATAN Karyawan Islam (AMP) telah melantik pengarah urusan sebuah firma teknologi maklumat (IT), Encik Muhd Shamir Abdul Rahim, sebagai presiden sayap belianya, AMP Muda.

Encik Muhd Shamir, 31 tahun, mengambil alih jawatan itu daripada Encik Saktiandi Supaat, 40 tahun, yang telah memegang jawatan itu selama tiga tahun.

Dalam satu kenyataan AMP semalam, Encik Muhd Shamir berkata lembaga pengurusan AMP Muda pimpinannya akan meneruskan pendekatan kerjasama yang diambil lembaga pengurusan lama dalam

menganjurkan kegiatan dan program sayap belia itu.

“AMP Muda akan meninjau penubuhan kumpulan tidak formal seperti kumpulan minat bersama dan persahabatan dalam kalangan rakan-rakan industri dan jawatankuasa kecil bagi menggalak lebih ramai karyawan tampil melibatkan diri dalam kegiatan yang mereka gemari,” kata Encik Muhd Shamir, pengarah urusan Sypher Labs.

Menerusi rangka tidak formal itu, karyawan yang sering sibuk akan dapat memberi sumbangan sebagai pakar sumber, ujar beliau.

Memandang ke depan, AMP Mu-

da sedang meninjau melancarkan semula program pemikiran kritikal ‘Siri Inteligensia Belia Muslim’ yang diperkenalkan pada 2005.

Antara isu yang bakal dibincangkan dalam siri itu ialah kesedaran tentang alam sekitar, salah satu tumpuan AMP Muda.

Sehubungan itu, sebuah buku yang membincangkan hubungan antara kesedaran tentang alam sekitar dan Islam akan dilancarkannya bulan depan.

Sementara itu, Encik Saktiandi, yang telah bergiat dalam AMP selama 10 tahun, berkata memimpin AMP Muda satu pengalaman sung-

guh menarik dan banyak yang telah beliau pelajari dalam berinteraksi bersama para sukarelawan dan kakitangan dalam usaha meningkatkan pencapaian masyarakat.

Ketua penyelidikan tukaran asing di Maybank itu juga berkata semasa tempohnya sebagai presiden, AMP Muda turut memberi tumpuan pada usaha mempertingkatkan proses dalaman, memperluas keanggotaannya dan mengeratkan rangkaian profesional dan industri.

Encik Saktiandi menambah bahawa beliau akan terus berkhidmat secara sukarela dengan AMP dan AMP Muda.